

高雄小故事

彼年，我佇加工區

撰文／洪淑昭



早前阮踳佇新草衙，佇阮這條巷仔內底，至少有一半以上的查某囡仔，初中畢業就去加工區食頭路，中日電子、高雄電子佱全球電子這三間公司，佇阮巷仔內上蓋受著歡迎，因為 in 的福利比臺灣人開的工廠較好，薪水嘛較懸，所以，阮讀的前鎮國中佇彼當陣就佱 in 合作，設立建教班。

學校的建教班，就是加工區的工廠佱學校合作的一款方式，學校保證學生未來畢業有頭路，工廠嘛會當穩定人力的來源。早前，做加工出口上需要的是大量人力資源，有這種建教班的成立，無論對學校抑是生產線，是雙方面攏好的一款合作。

會參加建教班的學生，多數初中畢業就無欲閣讀冊矣，所以規个國三的彼一冬，攏佇工廠實習。早起時，交通車會來載遮的學生去工廠倚生產線；下晡下班了後，才閣共學生載轉來學校。建教班的學生自開始去工廠，就有月給通好領，雖然和在額比起來有較少淡薄矣，毋過，有錢通趁，對家庭的經濟誠有幫贊，毋才阮這條巷仔的查某囡仔，誠濟人參加建教班。

講起加工區，我佇內底工作的經驗，總共有三擺。

第一擺行入去加工區，是我佇國中畢業的時，綴隔壁的囡仔伴去做個外月的作業員。猶會記得彼當陣，我倚的是電視成品檢驗站。有一遍，因為所做的動作攏全款，我煞鈍龜插毋著電壓，害規臺電視攏燒歹去，予組長罵甲臭頭。這嘛予我知影，看起來簡單的工課，並無親像所想的彼爾仔輕鬆。

第二擺閣行入去加工區，是高商畢業考牢加工區的報關行。彼時，加工區報關行的薪水比外口的報關行懸欲甲一半，只不過，逐日攏著愛加班，若拄著月底欲結關的時，

拚甲暗時 11、12 點才有通下班，嘛是誠四常的代誌。

最後一擺是佇大學畢業了後，考入去區內的科技電子公司做秘書。彼時的加工區當咧轉型，對靠人工的傳統工廠，變作愛有資本佢設備的科技公司才接有單，所以，阮草衙有足濟的朋友，就是佇這時退出加工區的生產線。

想起來，我比其他的查某囡仔閣較好運，因為這三擺的經驗，予我佇每一擺的行入去和離開的時，攏予我揣著改變家己未來的機會。

本文榮獲「2020 年高雄小故事」第一級佳作

